

建齋辨園文錄

斌丞署端

健齋辦團文錄卷三

富平楊昌年紀五

申告

開辦東四團曉告

民國二年

爲明宣大義策勵人心事照得國無大小自治者昌人無智愚自立者強自海
宇滄桑羣盜蜂起良民久困於寇盜吾鄉受害於豺虎哀此黎元莫可告訴懦
者以畏賊而媚賊黠者且歆賊而效賊嗟我絃誦之鄉幾變爲榛狉之地甚可
傷矣居今日而圖自衛亦惟有保甲團練之一途舍此更無長策然徒法不能
以自行亦惟視乎其人其心與其所以行之者實與不實奈何吾鄉之人志趣
各殊坐昧剝膚之災有團而不知練雖練而不能實視製器爲派差等上操爲
兒戲束手待劫惟期倖免癡心利己弗顧良籌既不知自強復不與人共強鄰

里不相聯鄉黨不相顧坐使賊勢熾勝遍蹂鄉曲此豈天災抑亦人事之咎也
今幸四團之衆奮起同心洪修團政以爲保家保身之要圖本團總等德薄能
鮮旣爲衆所推舉敢不夙夜憂勤救此焚溺之苦勉以自立之策修爲自衛之
政竭各人手足心思之力以強各人之身兼合衆人手足心思之力以強衆人
之身身強則團強團強則家與鄉無不俱強迨天之未陰雨徹彼桑土綢繆牖
戶精心思之實力行之倡始之方雖在首人執行之力實由團衆所望我同團
諸君子以及團衆人等自求多福毋惰厥志必振委靡必除虛僞器械必求精
良武藝必期精練巡防之密必愼必勤赴救之勇有嚴有翼清姦宄不遺餘力
釋嫌怨能明大義其平居也敦本業重人紀聽號令受約束不作非爲毋蹈刑
憲其共事也賢者任事能者任職豐財者出資壯健者宣力大家世族倡於前
小戶寒門隨於後貧富相恤相顧聯爲一心疏戚相愛相關融成一氣果能如

此則磐石金湯在我鄉里自強之效可觀而身家可保地方之福豈惟鄙人之幸若其不顧大局惟知利己一切規畫或更撓敗不但自誤兼以害羣本團總等雖欲處理從寬而衆所不容亦惟有繩以團法以謝大衆彼時悔之不可及矣所訂簡章另行宣布其各共體斯言無負苦意焉切切此告

愷析利害曉告

民國二年

爲剗陳利害開悟愚頑事照得人性本善未有生而爲惡習染成惡終可反而歸善自四方多故外盜環生我里無知子弟時而誤淪於匪考其淪陷之由皆因父母失教於前地方縱弛於後養成積惡貽害鄉里跡其兇惡山積罪固不容於死惟本團總蒞事之初不忍不教而遽殘其生今特委曲開導期續爾命其敬聽諸人生在世只有善惡兩途善者得福惡者得禍爲善積久榮及祖先作惡太甚禍延骨肉爾輩耳目口鼻同是人也何以不爲善而獨爲惡鄰里賤

惡先祖蒙羞人皆安而爾獨危人皆貴而爾獨賤人皆榮而爾獨辱能不自愧
父母有子皆望成人十月懷胎三年撫養爾之父母亦猶人也奈何成立之年
不爲人而竟爲匪使爲父母者奉養無所賴似續無所託朝露危身不知死所
爾若有子如此爾必羞恨何以爾爲人子作此暴行能不自愧人世爾我之分
童子皆知無故取人一錢人且謂之盜今乃劫人之財擄人之貨辱人之身毀
人之家其謂之何假使爾爲善而人爲惡人以如此害爾爾必不甘今以如此
害人人豈容爾能不自危然爾等之所以爲此或係迫於饑寒盍亦思饑寒之
由由於放蕩勤儉之家自饒衣食以已放蕩之身破人血汗之產以人血汗之
產供已放蕩之費天理何容能不自懼抑爾等所以爲此者不過曰快樂也盍
亦思守分者常安爲善者最樂爾輩爲匪時常畏人覺察比其犯案又畏人緝
捕及至被逮到官也刀鋸在前桁楊在後求死不得求活難脫幸而在逃也中

心惕惕無處着脚釜底遊魂何謂快樂能不自悲夫罪惡盈貫必遭奇禍縱無人咎必有天刑前乎爾身而爲著匪者今有幾人存乎同乎爾身而爲著匪者復有幾人存乎縱其兇惡十倍終皆刑戮慘斃滅祀覆宗寧不聞乎豈尙有白首康寧子孫昌盛者乎壯年易度老病倏至作匪豈是長策及早當思改過往者地方失理故得容惡今團事大舉匪類久爲人憤若欲仍前作惡何處可以藏爾之身本團總固欲教而生爾不欲遽行殘爾惟爾不用命乃終無赦今與爾等約但能勤苦何業不可謀生但能改正何地不可安住日檄到日各早熟思詳審利害父詔兄勉及時回頭或安耕農或作傭工或出遠方營生苟能改惡爲善無不咸予維新與良民一體相待決不究既往之過若更能發憤贖愆來與團內出力尤必破格拔擢予以榮獎其有改過之後隆冬困於饑寒鄉約察報定籌撫恤不令餓斃其或舊夥不欲爾輩自新反來欺凌許即密報團內

定加保護不使受屈倘仍執迷不悟依舊爲非則是冥頑不靈自絕生路本團總雖心實哀爾而公憤所不容定當嚴行捕捉盡法懲處身死荒郊肉飽狗彘聞者酸心過者掩鼻父母妻子號呼乞憐莫之能救仍須負不道不教之罪責若或愚父頑母不惟不教其子反以強梁爲美樂享盜賊之利必受加重之罰今者禍福之幾懸於眉睫善惡之念辨乎俄頃即望該本團保正團長鄉約等持檄傳集若輩爲非之人與其父兄明白講示再三開導各速取保出結及早自新無再怙惡終貽後悔切切檄到如律令

一禁窩藏盜匪毒害地方二禁佩持槍刀橫行鄉里三禁私搜煙土藉擄財物四禁抽頭聚賭敗壞風俗五禁蔑理逞蠻動輒鬪毆六禁婚姻不諧糾衆搶娶七禁宰殺耕牛妨害農功八禁忤逆父母毆打兄嫂九禁凌犯尊長欺虐孤幼十禁婦女不規潑鬧街巷

禁竊秋禾 民國二年

秋禾被野鼠竊縱橫鄉牌何事竟爾夢夢急飭堡衆輪派巡更日查匪跡夜走田塍倘有鼠盜拿捕重懲疏防被竊責罰匪輕鄉牌受譴更夫遭刑仍令捕盜務獲賊名功則厚賞過必嚴繩凜之令不虛行

告到賢鎮查夜 民國二年

城中夜禁最宜嚴明黑夜行走手提明燈三更以後斷絕人行如有犯者責罰不輕倘係匪徒立拿重懲安設柵欄隔礙行蹤更夫盤詰毋令縱橫牌哨各長巡夜查更居民主客有不正經招留匪類來歷不清立刻究治以遏亂萌倘敢徇縱法不容情

告各團冬防 民國二年

隆冬暮夜宵小如林各人門戶點檢必親掏牆越壁處處留神夜長夢多謹防

宵深隨時起視力戒因循更夫守夜務宜小心或輪或雇一體認真更點分明番數殷勤梆鑼之外暗地密巡隱聽蹲伏有無聲聞輪次住戶醒睡拍門縱有竊匪何能相侵倘或不慎自啓瑕釁一朝失事該怨何人更夫疏懈法必嚴懲失主偷安徒致磋坤切切誥誠勿謂具文

通傳開操儲備

民國三年

現在外間消息不謬誠恐禍患迫臨苟不先事籌防難免倉皇失措應自九月初旬起各團照依舊期實力舉辦操演聽候擇期大操以作士氣至於巡更會哨舊有定法亦應一體舉行免致疏虞每小鎗一桿均令自備火藥五斤抬鎗大炮公中另製火藥寬儲備用子彈扣火均不可缺鎗矛損壞城垣倒塌均須修補此係安危大計不比尋常指揮有備無患懷安白毒今春西山之變即是前轍務望共鑒斯言勿稍因循尤勿妄信無稽致彼庸愚搖奪必須依期舉辦

限日課功倘或虛應故事貽誤團民責有所歸勿當兒戲除另張告白外合再通告到日各存一張上自團紳團保下至牌長鄉約公同籌議確實施行本團總心香祝禱有厚望焉切切此告

告到賢鎮店戶稽查奸細

民國三年

奸人混跡通衢地面與客同宿誘客出店曠野行劫歷有此患告爾店戶留心察看但係匪徒不准招站力不能拒密報團練立即驅逐重則拿辦倘或私留其咎難逭設立店簿登記客伴團長派人夜夜查驗毋令疏虞行旅安晏

告各團戒備

民國四年

現值南山不靖團練更宜認真每日演槍打靶刀矛肄習加勤聞鐘速即來應軍器各要隨身夜晚巡更會哨守禦最宜小心嚴防外來匪類緊察本地奸民倘有乘機煽亂抑或搶劫鄉村立即拿捕格斃切勿留伏禍根平昔講求武藝

使用全在當今際此安危所繫可不戒懼圖存團事作爲家事實心實意經營
大家同聲振起籌策早共思尋勿再朦朧似睡專壹推託因循藉口私務繁冗
竟忘禍患迫臨責成團保牌長鄉約董率稽詢勸懲激其志氣鼓舞振其精神
果爾干城克寄自足共渡危津倘敢泛觀漠視誤己且以誤人查出定行重治
軍法自古無親

禁拾麥行竊

民國四年

荒歉麥田農夫繫命嚴拏偷竊痛懲示衆婦女拾麥規之以正剪穗採堆亦同
此令近村田畝鷄豚勿縱糟踐必罰決無徼倖

申告到賢鎮捕盜

民國四年

照得盜風近熾皆由團防失職紳首義難辭咎爾衆抑豈無責思昔鎮城糜爛
家家晝夜悚惕辛苦經營連年始克稍安枕席奈何甫出水火便爾偷安旦夕

團保玩愒卒歲鄉牌袖手偃息退避自矜得計奉令反嗤勞力甘心覆轍自蹈
那顧焚堂燕及十室必有忠信豪傑豈無特識謀人即以謀己公益便是私益
而况職居人上保衛原司寧輯坐令閭閻破壞內省寧不歉仄鎮城屢盜不捕
西鄙賊賊私釋似此藏奸誨盜那不擇人攫食自今申明團紀其各奮迅洗滌
上自團保總約下及鄉牌壯籍職務咸思自盡俯仰勿慚名實平居勤察匪類
祕速報請發摘深夜巡更會哨邊隅慎審周密失盜定期破獲窮搜斷盡蹤跡
務使鼠徒破膽不敢正眼窺隙此雖治標末務實屬對症藥石勿謂劬勞煩苦
惟此作爾安宅功多自有厚賞金錢毫不吝惜倘再泄沓如故團法萬難姑息
凡遇被竊一案更夫千棍懲擊若是失更未派鄉牌受棍責勅仍令限期獲盜
不許空言搪塞本管總約團保督催並畫方策倘竟置身事外一體重受譴謫
法戒昭然炳布苦心勸勉詳悉凡我在團有衆功罪審思自擇

聞警救應告

民國五年

照得世途多故緊防土匪乘機倘有搶劫財物即行格斃勿疑白日巡查瞭哨
深夜守更坐堆有事鳴鐘放礮彼此救應莫遲至於國家大事鄉愚勢難盡知
但求身家自保切勿出境招非縱有突然風警惟須鎮靜自持苟能團結不亂
自得整暇無虧慎勿輒先警擾開門揖盜徒譏倘能勉聽告誡一方安謐可期

聞警告慰團民

民國五年

告我團人其各安堵勿自驚惶膽小如鼠但有團在爲爾作主修我戈矛完我
城櫓縱有奸民伊誰敢侮設遇大敵堅壁禦守清野良法效著今古徒畏何益
急圖振武若無團局賴誰憐汝危不獨安福不偏撫與我黎庶保我鄉土吉凶
利鈍同其臧否我實此心期不相負勉聽斯言毋爲自苦倘或輕搖反招奸虜

禁造謠撓公

民國五年

聞有奸民幸災煽亂造言熒惑圖壞團練亟應查拿立予重辦又有愚民蠢頑可嘆聞警散操是何打算告我團人身家爲念急速演操莫作閒看官人召徵勿得違玩牌長催督切莫抗辯地方大計是非應辨齊聽指揮共謀安晏倘再迷惑貪圖自便藐視頭目凌忽傲慢惡語相加挺身故犯如此頑劣理何能勸以法從之重懲無逭其各凜遵以濟大難

兵後申告嚴防

民國五年

四團通覽照得此番險難我團中竟得平安渡過此非人力所及實賴天心默佑然當嚴重時期曾費許多謀畫非漫漫然莫之致而至也今者前險已過後事仍不可知陝局鼎沸變故環生緊防突來之兵乘人不備禍患每生於所忽興鎮覆轍永爲前鑒我四團處此通衢尤當加意嚴防儆戒不虞萬勿以爲大股猶不來侵自覺無事而有驕心因之懈怠城門仍當多派人員嚴加防守注

意啓閉無事常封白日則瞭望防警

專人執鎗以備之

黑夜則守更巡城

專派有身家者主之

一如

其舊並須擇人萬勿以老弱愚蠢誤事萬一有失則上下齊責首人更加嚴罰至於操練之期打靶之令當於另文傳宣又如修德凝祥祈天悔禍業派專紳演講昌於暇日並當扶疾開導此尤保安圖寧之首要最不可忽乃各處辦團者多不聞此所以每每正爲邪敗身受其毒豈其智勇不如我哉天降之咎智勇無足恃也其各念諸書到各團望即抄錄一張存備省覽再書多份張貼周知以輔我所不逮勿徒轉過即了爲幸

責成鄉牌打更捕盜

民國五年冬

盜風近熾團保之咎鄉牌何事巡更蔑有亟應振刷以雪前垢祕事稽查早發奸醜長夜巡更慎固封守倘再被竊更夫不宥失更失派鄉牌罪首一律提問撻以千數肉綻血淋痛懲甚苦仍必緝盜帶罪贖捕限期責獲空言莫補團保

總約身膺鄉土先事後事程督鼓舞巡更有無賊賊獲否引爲己責其綱乃舉
置身事外惟罪之府法必實行不分親友

初辦第四區保衛團曉告

民國六年春

爲剴切告誡以開遷善事照得皇天生人不能有善而無惡官府行政理必先
教而後刑自辛亥以還四方雲擾吾邑中驍猛弟子誤墮迷津流作匪類帶鎗
佩刀滋爲民害者亦已久矣祇因一念之差遂成終身之誤人皆諡之以匪名
而又惡之如蛇蠍軍隊追勦鄉團圍捕逃匿無地竄身無所同是人也何獨甘
於如是一經捕獲生命難保身死家亡辱及先祖骨肉遭刑屍骸委棄奔世惡
名人人賤詈同是人也又何自棄如是前者已死後者不悟自逞雄梟輕擲性
命迷而不悟終登鬼籙遊魂無歸長號中夜同是人也又何冥頑如是豈不哀
哉茲值本紳等舉辦團務之初正是與民更始之際既軫念善良者水火方深

亦矜憐迷途者沈淪莫救是用特發告諭開示禍福指點前途引導歸路使知前罪可贖後福堪求去惡從善永免刑戮苟詳告而猶不聽則終成棄人矣大抵作匪之徒半多小慧吉凶禍福無不畧曉特其朋比匪人狂心莫制遂以陷溺固有抵死不返亦有欲罷不能蓋身體之奉養金錢之揮霍無所從也鄉里之搜求讎仇之報復自足畏也然皆地方往年無人主事之故耳今則地方整頓團務大興合數十團而一之舉步皆屬藩籬爾輩尙不回首更待何時茲與爾等約苟能痛悔前非改過自新担保安然無事苟非十分大惡決不追究前愆即有銀錢事故與人交涉苟能和平了結亦決不至罪戾及身自新之後或就地業農或出外從軍均可贍其身家地方既定外匪不入亦無慮其報復倘有槍械價買歸公公平給值亦不問其來由如斯處置可爲仁至義盡能聽是語宗祖有靈若更眷戀迷途徘徊歧路依舊禍民敢犯新罪者必誅無赦身死